

«Handia zarelako»

Antton Abaddia saria eman zioten atzo Karmele Esnal ikastolako andereño ohiari

I. Petxarroman / Donostia

Miloi bat pezetako diru saria eta Xabier Lakak egindako oroigarria jaso zituen Karmele Esnal ikastolako andereño ohiak atzo Luis Maria Ban-

dres Gipuzkoako Foru Aldundiko Kultura eta Euskara diputatuaren eskutik. Esnalek EGUNKARIAri esana zion uste zuela «pertsona handi eta garrantzitsuei» bakarrik ematen zizkietela horrelako sariak. Luis Maria

Bandresek hori hizpide hartuta esan zuenez, «zu ere handi eta garrantzitsua zara Karmele». Frankismo garaiko urte gogorretan ikastola eta euskararen alde egindakoak eskertu zizkioten sariaren bidez.



PABLO S. QUIZA

Karmele Esnal, atzo, saria jaso ondoren, lagun batekin hizketan.

GIPUZKOAKO Foru Aldundiko areto nagusia jendez mukuratu zen atzo Antton Abaddia sariaren emate ekitaldian. Karmele Esnal ikastolako andereño ohiari saritu zuten, eta haren lagun eta senideez gain, euskal kulturaren eta politikaren munduko aurpegi ezagun ugari bildu ziren. Inaxio Oliveri Eusko Jaurlaritzako Hezkuntza sailburua, Iñaki Uria EUSKALDUNON EGUNKARIAko kontseilari ordezkarria, Mikel Aizpuru UEUko zuzendaria eta beste hainbeste izan ziren ekitaldian atzo.

Aurtengo epaimahaia osatu dutenek saria Karmele Esnali ematea deliberatu dute, Frankismo Garaian, «isilpean, erdi ezkutuan eta klandestinitate gorrian» ikastolen eta euskararen alde egindako lanagatik.

Luis Maria Bandres diputatuak adierazi zuenez, «ikastolen sorrera eta bilakaeran egindako lanagatik, eta Antton Abbadia euskaltzalearen asmoari jarraitu izanagatik, alegia, belaunaldi gazteak hizkuntzaren geroari lotzeko asmoari jarraitu izan-

KARMELE ESNAL • *Andereño ohi*

Isil-isilik, beti lanean

soslaia



Orion jaio zen Karmele Esnal, 1932. urtean. Zortzi urte zituela, Donostiara aldatu zen familia, eta han egin zituen batxilergoko ikasketak. 1947an Gasteizera joan zen Irakasle ikasketak egitera, baina hiru urte geroago Donostiara itzuli zen, eta Gipuzkoako hiriburuan amaitu zituen irakasle ikasketak.

Hiru urte geroago ezagutu zuen Elvira Zipitria, eta hark Parte Zaharrean zuen ikastolan praktikak egin zituen urtebetez. 1955ean bere ikastola sortzea erabaki zuen, Pedro Egaña kaleko etxebizitza batean, zazpi ikaslerekin. Hiru urte geroago Artzain Onaren plazako 18ra aldatu zuen, ordurako 35 ikasle zituelako jadanik.

Jarrai antzerki taldean aritu zen urte haietan, Iñaki Beobide zuzendari zela. 1960ko hamarkadan *Zeruko Argia* aldizkarian Gazte Naiz sailean argitaratu zituen hainbat artikulu.

1965ean Barrian (Araba) antolatu ziren lehen euskarazko udalekuean parte hartu zuen, eta urte berean Santo Tomas lizeora aldatu zen, han gela handi bat alokatu baitzioten. Urte batzuk geroago ikastola horretako egiturara bildu zen, eta han lan egin zuen erretiroa ailegatu arte, 1997ra arte hain justu ere. 1991n Bagera Donostiako euskaltzaleen elkartearen sortzeko bileran parte hartu zuen. Iaz ohorezko euskaltzain izendatu zuten, eta Euskal Idazleen Elkarteak ohorezko bazkide. Egun, Bagera elkartearen barruan *Mintzalagun* izeneko programan ari da, euskara ikasten ari direnei laguntzen.

nagatik». Diputatuak esker hitzak izan zituen behin eta berriz Esnalentzat. «Zuri esker eta zuk bezala lan egin zutenei esker dugu egun dugun egoera. Ez nuke pentsatu nahi non egongo litzatekeen euskara, egun dagoen egoera ikusita, zuek hazia erein ez bazenute».

Diputatuak adierazi zuenez, «euskara euskal herritarren ondarerik preziatuena» da, eta Karmele Esnali eskertu zion urteetan egindako lana. «Horregatik oso bestelakoa da gaur egun ikastolek duten maila pedagogikoa».

Elvira Zipitria gogoan

Karmele Esnal hunkiturik mintzatu zen saria jaso zuenean. «Zorabiatu nagoela uste dut. Nire lana beti isilpean izan da, eta ez nuen uste horrelako sari bat jasotzerik», esan zuen.

Foru Aldundiari eskertu zion «berarekin eta ikastolekin» gogoratu izana, eta hartutako saria Elvira Zipitria, Juan Carlos Santamaria, Joxemi Zumalabe eta Jose Mari Lasarteri eskaini zien.

Unibertsitate barruti irekia ondorioak ondo aztertu gabe ezarri nahia egotzi dio Madrili Jaurlaritzak

■ 2001-2002.

ikasturtean izango dela indarrean iragarri du Raxoi ministroak

Erredakzioa / Donostia

ESPAINIAKO Unibertsitate Kontseiluak barruti irekiari baiezkua eman diola eta, Hezkuntza Ministerioak erabakia «ondorioak sakonean aztertu gabe» hartu nahi duela ohartarazi du Jaurlaritzako Hezkuntza Sailak.

Barruti irekia arautuko duen dekretua urtea amaitu baino lehen onartu nahi du Gobernuak, eta Mariano Raxoi Hezkuntza ministroak jakinarazi duenez, 2001-2002 ikasturtean jarriko da indarrean. Barruti irekiarekin, ikasle guztiek aukera berberak izango dituzte edozein unibertsitatean matrikulatzeko.

Hezkuntza Sailak «barruti irekiaren ideien alde» dagoela dio, baina ikasleen mugikortasunerako eskubide horrek «Europako Batasuneko herrialde guztiak» bere baitan ez hartzea deitoratzen duela.

«Dekretuak ez ditu aurreikusten ez unibertsitate unibertsitateko joango diren ikasleen kopuruak, ez koste ekonomikoak ezta gure Autonomia Erkidegoaren hizkuntz berezitasuna ere», dio Eusko Jaurlaritzaren prentsa oharrak.

Gizon bat hil da Ordizian trenak harrapatuta

Erredakzioa / Donostia

76 URTEKO gizonezko bat hil zen atzo Ordizian, trenak harrapatuta, Eusko Jaurlaritzako Herrizaingo Sailak jakinarazi zuenez. Istripua arratsaldeko 19:15etan gertatu zen: gizona beste pertsona batzuekin batera trenbidea gurutzatzen ari zela, Lezotik Arbisenerako (Zaragoza) bidea egiten ari zen trenak jo zuen. Anbulantzia bat joan zen istripu izan zen lekura, baina gizona hila zen ordurako.